

Mantegnair ils meds d'investiziun

La regenza grischuna è s'exprimida envers las propostas da spargnar da la confederaziun

■ (anr/ac) La regenza grischuna è da l'avis che l'agricultura saja d'impurtanza per la societad grischuna. Perquai propona la regenza a la confederaziun da reponderar il program da spargnar che pertutga ils pajaments a favur da l'agricultura per ils onns 2018 enfin 2021. Principalmain quai che pertutga ils daners a disposiziun per meglierar las structuradas ed ils credits d'investiziun.

La regenza grischuna propona a la confederaziun da desister da spargnar entaifer ils pajaments a l'agricultura. Concret pledenta la regenza ils daners a favur da las mesiras socialas, da la promoziun dals products ed ils meds a disposiziun per meglierar la basa da producir da l'agricultura. En quel sector vul la confederaziun reducir las contribuziuns per adattar las structuradas per 11 milliuns francs sin 88 milliuns francs. Ils credits d'investiziun èn previs da reducir dad 11,5 sin 2,8 milliuns francs. Gia l'onn passà è la summa a disposiziun per ils credits d'investiziun vegnida reducida marcantamain. La regenza ha preni posiziun envers la consultaziun da la confederaziun pertutgant ils pajaments a l'agricultura per ils onns 2018 enfin 2021. Pajaments che la confederaziun vul sutmetter a las stentas da spargnar per stabilir las expensas federalas. Per part ha la regenza grischuna valità las explicaziuns e las mesiras avisadas da la confederaziun per cuntradicoras. Ella fa valair l'impurtanza da las structuradas agriculas per mantegnair ina agricultura abla da concurrer. Las propostas da stritgar surproporzionalmain tar ils credits d'investiziun ed ils meds a favur da las structuradas impedischan



La regenza grischuna na vul betg che la confederaziun spargnia tar ils credits d'investiziun e tar las contribuziuns a favur da las structuradas agraras.

FOTO J. F. PAJAROLA

ils manaschis da surpigliar las incumbensas dals manaschis che chalian da producir. Dad ina vart saja la confederaziun da l'avis che la politica agrara 2014 enfin 17 haja pudì cuntanscher las finamiras avisadas. Da l'autra vart pretendia la confederaziun dentant che l'agricultura adatteschia vinavant sias structuradas per pudair producir a moda economica, scriva la regenza grischuna en sia posiziun. Tenor la regenza gri-

schuna appartegnan ils credits d'investiziun ad in dals pli impurtants meds per promover las structuradas agraras. Las propostas da reducir marcantamain quellas contribuziuns valetescha la regenza grischuna per betg chapavla. In aspect positiv vesa la regenza almain en il tschep existent dals credits d'investiziun che vegnian spisgentads da las amortisaziuns dals credits gia concedids.

Il basegn d'investar è grond

La regenza grischuna vesa en l'avegnir in grond basegn d'investiziun tar las meglieraziuns e dad adattar structuradas existents, da financiar projects da valor regiunals ed ulteriurs gronds projects sco midar terren en connex cun revitalisar flums e dutgs. Per la regenza cuntradià la reduziun dals daners a favur da las structuradas a las finamiras da la politica agrara 2014–17 ed als basegns effectivs per su-

stegnair las structuradas agraras. En sia posiziun scriva la regenza tranter auter che la confederaziun stoppia esser cunschenta che diversas strategias lantschadas dad ulteriurs uffizis federalas hajan consequenzas finanzialas per l'agricultura. La regenza ha numnà las strategias da promover la biodiversità, per reducir il diever dad antibiotica e da s'adattar a la midada climatica. I na possia betg esser ch'i vegnia stritgà dad ina vart daners per introducir strategias gia planisadas u avisadas da la confederaziun. Consequentamain stoppian quellas strategias era vegnir redimensiunadas. Insumma betg suandar po la regenza grischuna a las explicaziuns da la confederaziun quai che pertutga l'influenza da la politica agrara sin las resursas finanzialas e persunalas dal chantun. Tuttas adattaziuns da la politica agrara, sajan quai midadas sistematicas dals pajaments directs u novas strategias federalas, pretendian dal chantun dapli resursas e quai finanzialmain sco nà dal persunal. L'esperienza mussa bain che la lavur tschessia suenter l'introducziun dal nov sistem. A lunga vista impedischan novas controllas ed il mantegniment dal nov sistem da reducir las resursas sin il nivel d'avant l'introducziun dal sistem nov. L'opiniun da la confederaziun che l'engaschi persunal vegnia a sa reducir en l'avegnir in quel regard dubita la regenza grischuna fermamain. Concretas propostas skizzescha la regenza envers la confederaziun per pudair nizzegiar meglier la rama da credit dad 88 milliuns francs per meglierar las structuradas e tuttina distgargiar las cassas chantunalas. Cassas che han sezzas adina dapli fadia da prestar lur cumparts pretendidas da la confederaziun per meglierar las structuradas agraras.